

Liebi Volleyballfans

D Saison 2022/2023 isch verbi u mir vom Dame 1 fahre äs ernöitsmau Lift.

Nachdem mir ir letschte Saison vor 4.Liga i d 3. Liga ufgstige si, hei mir üs risig gfröit. Umso meh, da mir dr Ufstig ohne fixe Trainer und Coach gschafft hei.

Drum si mir mit grossem Tatedrang i die erste Matschs gstartet. D Trainingsmätschs gäge Loufe u Liesberg si super Spiel gsi, doch hets de während dr Saison de doch nid wöue klappe. Obwohl d Sandra u d Alex z Beste versuecht hei mit em gemeinsame coache vo de Mätschs. Mir hei üses Spiel nid gspielt u hei üs meistens de Gägnerinne apasst. Ir Rückrundi, isch es de immer wie schlimmer worde u mir hei üs ou uf em Feld zum Teil nüme gfunde. Sigs bi de Ahnahme oder de Agriff, klappt hets leider nid immer. Ou d Stimmig isch zum Teil nüme toll gsi. Immerhin hei mir z letschte Spiel vor Saison doch no chöne gwinne u hei mit emne positive Gfüeu dörfe id Meisterschaftssaisonpouse gah.

Danke dir Anna für d Trainings wo du üs gäh hesch u danke dr Sandra u Alex für id Hand näh vom Coache a de Mätschs.

Us Team hei mir sicher alli gmerkt, das die agleitete Trainings, we dr Alex u dr Dave id Halle si cho, üs viel bracht hei, vorauem ou, da ALLI hei chöne trainiere u niemer het «müesse» leite. Aber da die super Trainings leider nid regelmässig si gsi, het ou das keh Konstanz ane bracht. Danke Alex u Dave fürs Leite u Coache. Vilicht gits bim Thema Trainer ja gli ä Überraschig????

Leider verlöh d Anna, Tania u d Chiara üses Team uf Endi Saison. Danke öich für ä Isatz.

Ou we mir its wieder ir 4. Liga spiele, fröie i mi persönlich druf, mit em «Harte Kern» dörfe i die nöi Saison 2023/2024 z starte.

Drum luege mir doch dr Start i die Saison als nöii Chance a, mit em Lift wieder i die 3. Liga ufzstige 😊

Babs